



IV GOVERNO CONSTITUCIONAL SEKRETARIA ESTADU KONSELLU MINISTRUS

KOMUNIKADU IMPRENSA

Soru-mutu Konsellu Ministrus iha loron 20 fulan Janeiru tinan 2010

Konsellu Ministrus hala'o soru-mutu iha loron Kuarta ida ne'e, loron 20 fulan Janeiru tinan 2010, iha Sala Soru-mutu Konsellu Ministrus nian, iha Palásiu Governu, iha Dili, no hakotu:

1. Dekretu-Lei ne'ebé Altera Rejime Aprovizionamentu Estadu nian.

Rejime Jurídiku Aprovizionamentu nian, ne'ebé hetan aprovasaun iha 2005, estabelese regra sira kona-ba akizisaun beins no servisu sira husi parte Estadu nian.

Diploma ne'ebé ohin Konsellu Ministrus aprova introdús medida importante balu ba prosedimentu aprovizionamentu nian, ne'ebé haree liuliu kona-ba, atu halo nia sai klaru, lalais no efikás liután, atu nune'e bele hasoru malu ho sosiedade sivil nia espetativa.

2. Dekretu-Lei ne'ebé Altera Rejime Promosaun Kargu Aas Militár nian.

Ho objetivu atu reforsa no konsolida papél Prezidente Repúblika nian nu'udar Komandante Supremu Forsa Armada, Dekretu-Lei ne'ebé ohin hetan aprovasaun determina rejime nomeasaun ba kargu hirak ne'ebé la prevee iha Lei-inan, maibé tanba razaun ne'ebé hanesan tenke hetan rejime ne'ebé hanesan kona-ba nomeasaun no demisaun.

Tanba halo reforma ba iha setór forsa armada liuliu iha estrutura komando Forsa Armada Timor-Leste nian (F-FDTL) mak hamosu kargu oioin iha topu irarkia militár ne'ebé la prevee iha Lei-inan.

3.Tulun ba Repúblika Haití.

Tanba konsekuénsia husi rai-nakdoko maka'as ne'ebé mosu iha Repúblika Haití, ne'ebé halo rahun país ne'e, Konsellu Ministrus, nu'udar átu solidariedade no fraternidade nian (prinsípiu fundamentál hirak ne'ebé hatuur iha Lei-inan Timor-Leste nian) hakotu hodi aprova tulun osan, ho objetivu atu hamenus súsar hirak ne'ebé mosu tanba dezastre naturál ne'e.

Nune'e mós tanba rai-nakdoko ne'e harahun edifísiu públiku no uma hela-fatín rihun ba rihun iha Haití, no provoca estragu ne'ebé sériu iha rede komunikasaun no enerjia país ne'e nian, nune'e mós vida ne'ebé lakon barak, no número kona-ba kanek no lakon ne'ebé sura la hatene.

Primeiru Ministru Timor-leste nian hato'o, iha tempu ne'e kedan, ba ninia omólogo Haití nian, ninia kondolénsia no espresaun solidariedade nian ne'ebé kle'an liu ba povu no Estadu Repúblika Haití nian.

4.Rezolusaun Governu nian kona-ba Resenseamentu Eleitoral 2010

Prosesu Resenseamentu eleitoral, ne'ebé oras ne'e la'o daudaun, sei hala'o iha suku sira. Ninia objetivu mak, iha parte ida prepara prosesu eleitoral ne'ebé prevee ba tinan ida ne'e, no iha tempo ne'ebé hanesan rezolve situasaun irregulár balun ne'ebé hetan iha ámbitu Subsídium Apoiu ba ferik-katuas no inválidu sira. Nune'e mós subsidiu ida ne'e fó atu garante subsisténsia sidadaun Timor-oan sira nian, ne'ebé hela iha territóriu nasionál, ne'ebé to'o ona tinan 60 ka tanba la iha kbit ona atu hala'o atividade servisu nian ida, no kartaun eleitoral mak sai nu'udar meu ida ne'ebé hili atu halo prova kona-ba nasionalidade no idade husi sira ne'ebé sai hanesan kandidatu ba subsidiu ne'e. Ho prosesu verifikasaun dados ne'e, Governu garante katak sidadaun hotu-hotu ne'ebé iha direitu sei simu pensaun hirak ne'e.

Konsellu Ministrus analiza mós:

1.Planu Asaun Lejizlativa ba Semestre da-1 tinan 2010.

Planu Asaun Lejizlativa ba semestre dahuluk tinan 2010 ne'ebé hetan diskusaun ona, atu nune'e bele tau iha agenda Lei no Dekretu-Lei husi área no setor oioin ne'ebé Konsellu Ministrus konsidera importante, atu halo aprovasaun, to'o iha Juñu tinan ida ne'e.

Planu Asaun ida ne'e reprezenta orientasaun lejizlativa ida ba Governu no parte husi metodolojia servisu nian ida ne'ebé tenke hadia husi tinan ida ba tinan seluk.